


Matla a Thapelo: Ho Rapella ba Bang



SABATHA THAPAMA

Bakeng sa Boithuto ba Beke Ena Bala:

Tšen. 12:7–9, Baef. 6:12, Baheb. 7:25, Baef. 1:15–21, Dan. 10:10–14, 1 Johanne 5:14–16.

Teman'a Khopolo:

“Bolellanang litšito tsa lona, ‘me le rapellane, le tle le fole. Thapelo ea ea lokileng e na le matla a maholo ho sebetseng ha eona” (Jakobo 5:16).

Litho tsa kereke ea Testamente e Ncha li ne li utloa bohloki ba tsona ba thapelo. “Eitse hobane ba rapele, ‘nqalo eo ba phuthehetseng ho eona ea sisinyeha, ‘me bohle ba tlala Moea o Halalelang, ‘me ba bolela lentsoe la Molimo ka matla” (Liketso 4:31). Bona, barutuo ba ile ba rapela. Ba ile ba tlala Moea o Halalelang, eaba ba bua Lentsoe la Molimo ka matla kapa ka sebetse.

Ho ne ho na le kamano e otlohileng pakeng tsa lithapelo tsa bona, ho tlala ka Moea o Halalelang, le phatlalatsa e matla ea Lentsoe la Molimo. “Barutuo . . . ha ba ka ba ikopela lithohonolofatso feela. Ba ne ba imetsoe ke moroalo oa pholoho ea meea. Ba ne ba hlokomela hore evangeli e lokela ho isoa lefatšeng, eaba ba kopa matla ao Kreste a neng a a tšepisitse.”—Ellen G. White, *The Acts of the Apostles*, leq. 37.

Ha re batla Molimo ‘me re rapella ba bang, Molimo o sebetsa lipelong tsa rona ho re hulela ho Eena e be o re fa bohlale ba leholimo hore re tle re ba fihlele bakeng sa ‘muso oa Hae (Jakobo 1:5). O boetse o sebetsa ka matla maphelong a bona ka litsela tseo re ke keng ra li bona kapa hona ho li utloisisa ka botlalo ho ba hulela ho Eena (1 Johanne 5:14–17).

**Ihute thuto ea beke ena ho lokisetsa Sabatha sa la 25 Phupu.*

Ntoa ea Maholimo le Mafatše

Bapisa Tšenolo 12:7–9, Baefese 6:12, le 2 Bakorinthe 10:4. Litimana tsee li susumetsa kutloisiso ea rona ea thapelo e etsetsoang ba bang joang?

Bibele e tlosa lesira le pakeng tsa lefatše le bonoang le le sa bonoeng. Ho na le ntoa mahareng a botle le bobbe, mahareng a matla a ho loka le matla a lefifi, pakeng tsa Kreste le Satane. ntoeng ena ea maholimo le mafatše, Molimo o batla tokoloho ea batho. Ha a ka ke a qhekanyetsa kapa hona ho qobella kelello. O romela Moea oa Hae ho kholisa banna le basali ka ‘nete ea leholimo (Johanne 16:7, 8). Manyeloi a leholimo a kena ntoeng ena ho susumeletsa batho ho ea ho bosafeleng (Baheb. 1:14). Hape Molimo o hlophisa menyetla ea leholimo ho tataisetsa batho ho Eena.

Seo Molimo o ke keng oa se etsa ke ho qobella kelello. Qobello e khahlanong le ‘muso oa Molimo. Qobello e hosele le tšiea ea lerato, leo e leng motheo oa ‘muso oa Molimo. Mona ke hona moo thapelo e leng bohlokoahali. Leha Molimo a etsa sohle se matleng a Hae ho fihlela batho le pele re rapela, lithapelo tsa rona li lokolla matla a maholo a Molimo. O hlompha bolokolohi ba rona ba khetho ka ho rapella e mong, ‘me a ka etsa se fetisang, moeelong oa ntoa e pakeng tsa botle le bobbe, ha re rapela ho feta ha re sa rapele. Lemoha polelo ena ka hloko, “Ke karolo ea leano la Molimo ho re nea, karabelong ea thapelo e entsoeng ka tumelo, seo a ne ke ke a re fa sona hoja re sa rapela.”—Ellen G. White, *The Great Controversy*, leq. 525. Ntoeng e kholo mahareng a botle le bobbe, thapelo e etsa phapano. Ha re rapella motho e mong ea sa tsebeng Kreste, e bula mecha ea tlhohonolofatso e halalelang hore e tle e phallele maphelong a bona. Molimo o hlompha khetho ea rona ea ho ba rapella ‘me o sebetsa ka matla a fetisang bakeng sa bona. Ha re sebetsana le taba ea thapelo ea bo buelli, ka boikokobetso re lokela ho ananela hore ha re utloisise mesebetsi ea Molimo ka botlalo, empa sena ha sea lokela ho re thibela ho kena tlhohonolofatsong tse tlišoang ke thapelo ho rona le ho ba bang.

Hobaneng u nahana hore Molimo o sebetsa ka matla a maholo ha re rapela ho feta ha re lesa thapelo? Leha re sa utloisisa ka botlalo kamoo e sebetsang kateng, hobaneng ha keletso ea Bibele ea hore re rapelle ba bang e lokela ho re susumetsa ho etsa seo hantle?

Jesu: ‘Muelli e Moholo

Bala Luka 3:21, Luka 5:16, le Luka 9:18. Litemana tsee li re bolella eng ka bophelo ba Jesu ba thapelo le katleho ea bosebeletsi ba Hae?

Bophelo ba Jesu e ne e le ba puisano ea nako eohle le Ntat’ae. Nakong ea kolobetso ea Hae ha a khakola bosebeletsi ba Hae ha e le Mesia, o ile a rapella matla a leholimo hore a tle a phethe morero oa leholimo. Moea o Halalelang o ile oa mo matlafatsa hore a etse thato ea Ntat’ae ‘me a phethe mosebetsi o kapele ho Eena. E ka ba e ne e le ho fepeng likete tse hlano, ho foliseng molepera, kapa ho lokolleng ba kenoeng ke batemona. Jesu o ne a elelloa hore, ntoeng e pakeng tsa botle le bobbe, thapelo ke sebetsa se sehlo ho hlola makhotla a lihele. Thapelo ke tsela ea leholimo e tlotselitsoeng ho kopanya ho hloka thuso le ho fokola ha rona le matla a a Molimo a sa sitoeng ke letho. Ke tsela eo ka eona re phahamisetsang ho Molimo, eo e leng Eena feela a ka amang lipelo tsa bao re ba rapellang.

Bala Luka 22:31–34 le Baheberu 7:25. Ke tiisetso e fe eo Jesu a ileng a e fa Petrose e le ho mo lokisetsa liteko tseo a tla tobana le tsona bokamosong bo haufi? O re fa tiisetso e fe ka bo mong ba rona ha re tobana le liteko?

Batho ba atlehang khapong ea meea ke banna le basali ba thapelo. Jesu o ile a rapella Petrose ka lebitso. O ile a tiisetso Petrose hore nakong ea hae ea moleko o moholo ka ho fetisisa, o tla be a mo rapella. Satane o ne a utloisisa matla a Petrose hantle bakeng sa ntšetsopele ea ‘muso oa Molimo. O ile a rera ho etsa sohle se ka esolang ho senya tšusumetso e molemo ea Petrose kerekeng ea Bokreste. Empa litekong tsa hae tsohle, Jesu o ne a ntse a rapella Petrose, ‘me thapelo tsa Morena li ile tsa arabeloa. Ke taba e thabisang hakaakang ho hlokomela hore Mopholosi oa re rapella le rona. O re mema ho ba ‘moho le Eena thapelong ena ea bobuelli ‘me re phahamise ba bang ka mabitso kapele ho terone ea Hae. Ho tiisetso ha rona thapelong ho ananela boitšetleho ba rona bo tletseng bo felletseng ho Molimo bakeng sa ho fihlela motho ka mong eo re mo rapellang.

U ntse u rapella mang hona joale? Hobaneng ho le bohlokoa ho se khaotse, ho sa natse na boemo bo bonahala bo le boima ha ka kang?

Lithapelo tsa Pauluse tsa Bobuelli

Thapelo ea bo buelli ke ntho ea Bibe. Bosebeletsing ba hae bohle, Pauluse o ne a rapella balumeli ba bacha likerekeng tseo a li hlommeng ka bosebeletsi ba hae ba evangeli. Pauluse o ne a lumela hore ho na le se etsahalang ha re rapela se neng se ke ke sa etsahala he e ne e ba ha rea ka ra rapela. Leha a ne a arohane le bao a ba ratang, o ne a eelloa hore lipelo tsa bona li ka teana ha ba rapellana.

Bala Baefese 1:15–21. Meleng e katlase, thathamisa likopo tse fapaneng tseo Pauluse a neng a li etsa ho Molimo bakeng sa Baefese. O ne a kopa hore Molimo o ba fe eng ka ho khetholloha?

Thapelo eo Pauluse a e rapellang balumeli ba Efese eea tsotaha. O rapela hore Molimo o ba fe bohlale le tšenolo ea tsebo ea oona, hore a tle a elise mahlo a lipelo tsa bona ka 'nete ea leholimo 'me a ba fe tšepo ea bophelo bo sa feleng. O ile a ba rapella le hore ba tle ba tsebe le matla a boholo bo sa lekanngoeng ba Oona maphelong a bona. Molimo ona o sebelitseng ka oona matla ana a sa sitoeng ke letho ho tsosa Jesu bafung, e leng ketsahalo ea motheo oa tšepo ea bona ea bophelo bo sa feleng bo ho Eena. Thapelo ena e qetella ka ho ba hopotsa ka “monono oa khanya ea Krete” le “lefa la Hae.” Ho lokela e be Bakreste ba Efese ba ne ba tletse ka matla, ha ba hopola hore Pauluse o ntse a ba rapella le se a ba rapellang sona.

Bala Bafilipi 1:3–11 'me u tšoaee boemo ba thapelo ea Pauluse. Haeba u ne u le setho sa kereke e Filipi joale u fumana lengolo le tjena ho tsoa ho Pauluse, a sa arolelane le lona feela hore u ntse a le rapella empa a bile a bolela seo a ntseng a se rapella, u ne u tla ikutloa joang, hobaneng? Ke litšepiso li fe tse fumanehang mantsoeng a eona? Ka nako e tšoanang, ke likeletso li fe tse teng hape?

Ana ke a mang a mantsoe a khothatsang ka ho fetisisa ka hare ho Bibe, a tletseng litšepiso, le lipitso tsa ho tlatsoa ka lerato le tsebo le tšenolo e tlišoang ke ho tseba Jesu e le hore re tle re be seo Molimo a rerileng hore re be sona ho Eena.

Matla a sa Bonoeng Tšebetsong

Thapelo ea bobuelli ke sebetsa se matla ntoeng e pakeng tsa botle le bobe eo re e bitsang “ntoa e kholo.” E ‘ngoe ea tšenolo tse hlakileng ka ho fetisisa ea ntoa ena ke Daniele 10. U tla hopola hore moporofera Jeremia o ile a porofeta hore ba-Juda ba tla ba kholehong Babilona lilemo tse mashome a supileng. Qetellong ea bophelo ba Daniele, nako ena e porofetiloeng e ne e atamela pheletso. Daniele o ne a tšoenyehile. O ne a bona bopaki ba phethahalo ea mantsoe a Jeremia bo fokola. Sechaba sa habo se ne ntse se le kholehong. Babilona e ile ea hloloa ke ba-Mede le ba-Persia, empa ba-Juda ba ne ntse ba le kholehong. Daniele a itima lijo a rapela ka libeke tse tharo. O ile a rapella sechaba sa habo ka tseo. Qetellong ea libeke tse tharo lenyeloi la hlaha ho eena.

Bala Daniele 10:10–14. Lithapelo tsa Daniele li ile tsa utluoa neng, empa li ne li thibetsoe keng ha nakoana?

Ena ke qotsulo e thahasellisang. Hore re e utloisise hantle, ha re hloae ba bang ba banka-karolo ho eona. Khosana ea ‘muso oa Persia ke mang? E ke se be Siruse. Ke morena oa ‘Musos oa Persia. Ho ka etsahala hore polelo “khosana ea ‘muso oa Persia” e tšoantša Satane. Jesu o na ‘mitsa “morena oa lefatše lena” kapa “[‘musi] oa lefatše lena” (Johanne 12:31, Johanne 14:30). Pauluse o ne a mo rehile “morena ea busang matla a sebaka” (Baef. 2:2). Haeba khosana ea Persia e tšoantša Satane, joale Mikaele eena ke mang? Lentsoe Mikaele le sebelisitsoe makhetho a mahlano kahare ho Bibe (Tšen. 12:7; Juda 9; Dan. 10:13, 21; le Dan. 12:1). Boithuto bo tebileng ba litemana tseba senola hore Mikaele (e bolelang “Ea kang Molimo”) e hlalosa Jesu Molaoli oa manyeloi ‘ohle ntoeng khahlanong le Satane. Jesu ke Mor’a Molimo oa bosafeleng eo esaleng a le teng. E meng ea mesebetsi ea Hae e le Molaoli ke ho hlola le ho timetsa Satane qetellong.

Daniele 10 e soaea lesira ‘me e senola ntoa e pakeng tsa botle le bobe. Ha Daniele a rapela, Mikaele, Jesu ea matla ‘ohle, o theoha leholimong ho chechisa makhotla a lihele. Leha mohlomong re sa bone, Jesu o tšebetsong ho arabela lithapelo tsa rona tsa bobuelli. Ke Mopholosi ea matla. Ha ho le e ‘ngoe ea lithapelo tsa rona e fetang a sa e hlokomela.

U bona taba ee ea ntoa e kholo e etsahala joang bophelong ba hau? Boteng ba ntoa ee bo lokela ho u bolella eng ka likhetho tseo u lokelang ho li etsa?

Chalimo ea Thapelo

Hohle kahare ho Bibehe, ho hatelloa ho qaqa thapelong. Thapelo ha se ngongoreho e lerootho ea moea. E hlahisa likopo tse hlakileng ho Molimo. Jesu o ne a rapella barutuoa ba Hae ka tsela e qaqileng. Moapostola Pauluse o ile a rapella Bakreste ba Efese, Filipi, le Kolose ka ho qaqa. O ile a rapella basebetsi ‘moho le eena ba banyane joalo ka Timothea, Tite, le Johanne Mareka.

Bala 1 Samuele 12:22–24 le Jobo 16:21. Liqotsulo tsee ka bobeli li na le eng e tšoanang? Li re bolella eng ka thapelo ea bobuelli?

Bobeli Samuele le Jobo ba tiisa bohloki ba bobuelli bo qaqileng bo tsoang botebong ba pelo. Mantsoe a Samuele a matla haholo. Oa hooeletsatsa, “‘Ha e le ‘na nke ke ka siteloa Jehova, le ho leka, ka ho lesa ho le rapella’” (1 Sam. 12:23). Ho utloahala molumo oa mantsoe a Samuele mantsoeng a Jobo, “‘Hore o emele motho ho Molimo (Jobo 16:21), le ngoan’a motho ho metsoalle ea hae’” Ke mosebetsi oa rona ho bua le Molimo sebakeng sa banna le basali ba sa mo tsebeng.

Bala 1 Johanne 5:14–16. Ho etsahala eng ha re buella ba bang?

Ha re rapella ba bang, re fetoha mocha oa tlhohonolofatso ho bona. O ba tšollela noka ea metsi a bophelo ho tsoa teroneng ea leholimo ka rona. Makhotla ‘ohle a Satane a ea thothomela ha a utloa bobuelli bo tiileng. Ellen G. White o hlalosa matla a thapelo ka mantsoe ana a matla: “Satane ha a batle ha ho ipiletsoe sereng sa hae se matla, hoba oa tšoha oa thothomela kapele ho matla le motlotlehi ba Hae. makhotla ‘ohle a Satane a ea thothomela ha a utloa thapelo e etsoang ka tieo.”—*Testimonies for the Church*, pok. 1, leq. 346. Thapelo e re hokahanya le Mohloli oa matla a halalelang ntoeng e tsekang meea e lahlehileng ea banna le basali.

Bala Mattheu 18:18, 19. Litemana tsee li na le kamano e fe le thapelo ea bobuelli, ‘me litemana tsee ke khotatso joang hore re rapele le ba bang bakeng sa pholoho ea ba sa tsebeng Morena?

Ho Ithuta Haholoanyane:

Bala Ellen G. White, “The Privilege of Prayer,” maq. 93–104, ho *Steps to Christ*; “Work for Church Members,” maq. 19–24, ho *Testimonies for the Church*, pok. 7. Ha re rapella ba bang, Molimo o hlompha boinehelo ba rona ho Eena le boitšetleho ba rona holim’a matla a Hae ka ho kenya tšebetso lebelisoa tsa leholimo ho fetola maphelo a batho. Ha lithapelo tsa rona li nyolohela teroneng ea Hae, manyeloi a raoha ka taelo ea Hae. “Manyeloi a sebeletsang a eme ho potoloha le terone hore a tle a phethe taelo ea Jesu Kreste ea ho arabela thepelo e ‘ngoe le e ‘ngoe e entsoeng ka tieo, ka tumelo e phelang.”—Ellen G. White, *Selected Messages*, buka ea 2, leq. 377. Re na le tiisetso ea hore ha ho le thapelo e le ‘ngoe e lahlehang; empa ho batla hore e arajoe ka tsela le bakeng sa eona ntho eo re e lebelletseng ka ho otloloha, ke boithetso.”—Ellen G. White, *Testimonies for the Church*, pok. 1, leq. 231. Taba ena e re fa khothatso e ka kang ha re rapella balekane ba rona ba sa tsebeng Kreste kapa bara le barali, baamani, metsosalle, le basebetsi ‘moho. Ha ho na le thapelo e le ‘ngoe e entsoeng ka tieo e lahlehang. Re ka ‘na ra se ke ra bona karabo ea hang hang ho bao re ba rapellang, empa Molimo o ntse a sebetsa lipelong tsa bona ka litsela tseo re tla li tseba feela ha re le ho bosafeleng.

Lipotso tsa Puisano:

1. Bala Bafilipi 1:19; Bakolose 4:2, 3; le 2 Bathesalonika 3:1, 2. Nakong ea ho ba chankaneng ha hae, Pauluse o ile a ba le tiisetso e fe ka lebaka la lithapelo tsa Filipi? O ile a kopa hore ba-Kolose le ba-Thesalonkia ba rapelle eng sebakeng sa hae? lithapelo tsee tsa bobuelli li na le kamano e fe le khapo ea meea?
2. Nahana ka boteng ba ntoa e kholo le ka hore ke eona ‘moko taba oa lafetše leo re phelang ho lona. Tsebo ea hau ea ntoa ee e kholo e u thusa joang ho elelloa bohlokoa ba thapelo? E, Jesu o hlotse ntoa, ‘me rea tseba hore lehlakore la Hae lea hlola qetellong. Empa nakong ena, hobaneng ho le bohlokoa hore re lule re rapela ‘me re leka ho etsa sohle se ka etsoa ho lula re mo tšepahalletse le ho sebeletsa pholoho ea ba bang?
3. Ke li fe tse ling tsa litšita tsa bophelo bo atlehileng ba ho rapella ba bang? U sebelisa boitatolo bo fe (haeba u etsa joalo) ho lesa ho rapella ba bang ka ho fetisa ba hloakang thapelo?